

## 8-кейс

Гулмира ҳовлиларининг олдидаги кўчага сув сепаетганди. Ёзда ҳар куни сув сепилиб, супириб, тозаланмаса, онаси уни уришади. Миллий одат шунақа, дейилади. Шу вақтда унинг курсдоши Азиз велосипедда кетаётган экан. Азиз тўхтади, улар озгина гаплашиб қолишди. Гулмиранинг сув сепиши лозимлиги эсидан чиқди. Институтда бўлган воқеаларни эслаб, анча кулишишди. Шунда Гулмиранинг дадаси ишдан келиб қолди. Дадаси Гулмиранинг саломига алик олмай уйда кириб кетди. Азиз ҳам салом берди-да, тезда йўлга тушди. Бир пастда Гулмиранинг онаси кўчага чиқиб, Гулмирани баланд овоз билан уришиб кетди. Гулмира, нима айб қилганини ҳеч тушина олмас эди. Онаси уни ёмон уришди. Жуда қаттиқ гапларни айтди. Гулмира уйга кириб роса йиғлади.

**Гулмиранинг фикру ўйлари:** Онам ҳадеб уришаверади. Нима, хотинлар фақат меҳнатга туғилганми?! Фақат иш, фақат иш... Нукул, онам битта гапни қайтаради: - “Бирор жойга борсанг, мени шарманда қиласан. Келинлар эрталабсоат 5 дан кечқурун соат 12 иш қилиши лозим. Сен фақат “ўқишим, ўқишим” дейсан. Менга ўқишинг керак эмас, менга ҳаммага ўхшаб эрга тегишинг керак. Аёлнинг бахти ўз вақтида эрга тегишда...”, деяверадилар. Қуриб кетсин ўша эр! Бир минут ҳам тинчлик йўқ! Ҳоҳлаганингни ҳеч қила олмас экансан-да... Ер менга нима каромат кўрсатиб беради, у ҳам фақат мендан иш талаб қилади, фақат ўзи бўлса майли-ку, яна қайнона, қайнота, жияну тоғаваччалар - ҳаммасига менинг меҳнатим керак бўлади. Ҳаммасига мен эгилишим керак. Менинг инсон сифатида қадрим борми ўзи?! Аёл кишининг бахти курсин, фақат меҳнатга туғилган, фақат бўйсунушга туғилган. Ҳеч ким “Сен нимани истайсан”, демайди. Нима учун аёл киши фақат эрга тегибгина бахтли бўлиши лозим. Агар эри ҳар куни уни дўппосласа-чи... Ундаям эр яхшими...

**Онанинг фикру ўйлари:** Бу қиз тушмагур ҳеч ҳаётни ўйламайди. Осмонларда ҳаёли... Ўқиб нима каромат кўрсатиб берарди... Менга қолса дарров эрга берардим-у, ундан қутилардим... Дадасини олдида уялмай бегона болалар билан хиринг-хиринг қилганига ўлайми.. Гап гапирсанг, ҳеч тушунмайди. Худди бошқа оламда юргандек... Бир гап айтсанг, ўнта жавоб оласан... Қайлардаги бўлмагур гапларни айтади. Ҳозирдан ўзини устун кўяди. Эрга бериб қутилмасам, ҳали мени роса қийнайди... Танлайверади, танлайверади... Эри икки марта дўқ қилса, анча ақли кириб қолади... Уни эрга бериш керак...

### **Кейс саволи:**

1. Нима учун Гулмирани онаси ёмон уришди ва унга жуда қаттиқ гапларни айтди. Онанинг мазкур ҳаракатига ўз фикрингизни билдиринг.

2. Гулмиранинг фикру ўйларини қандай баҳолайсиз?

3. Эри икки марта дўқ қилса, анча ақли кириб қолади... Уни эрга бериш керак... Сизнингча она тўғри фикрляптими?

4. Она манфаатлари билан қиз манфаатлари ўзаро келиша олмаяптими?

5. Ушбу вазият қандай оқибатларга олиб келиши мумкин?

6. Мазкур вазиятда қандай йўл тутиши керак?